

Joyce John prome Reina di Carnaval na Aruba es anja aki

Eugenio Winterdaal prome candidato pa Prins Carnaval

ORANJESTAD.— Un verdadero Reina di Carnaval, ta e hoben cu a worde eligi pa su club o un firma pa representa e club o firma durante dianan di Carnaval. E biaha aki srta. Joyce John di firma Supercleaning y Bandbox ta e prome cu a worde eligi como reina di carnaval pa firma Supercleaning y Bandbox. Antajera e la worde eligi cu 80% mas voto cu e dos otro competidornan, Ophelia Gonzalez y Irene Rasmijn.

Ta ta sigur caba cu reina di Supercleaning-Bandbox lo tuma parti na e gran competicion den Wilhelmina Stadion dia 23 di Februari y tambe lo pasa den e gran parada.

E prome candidato pa prins carnaval ja a presenta caba na Carnaval comite senior Eugenio Winterdaal, e miembro di Habrak Boys.

E preparacion nan pa carnaval ta bai bon na Aruba, segun nos a tende varios negociante a regala carnivalscomite un suma.

Aruba Social Club na Pos Chikito a cede su club gratis na comite pa dia 9 di Februari e dia cu durante un gran fiesta lo tin eleccion pa Prins di Carnaval.

Firma Berlinski a duna pa esun cu sali reina di Aruba un bunita „Gerard Perregaux” oloshi di man y un bonita set di joyas pa esun su sali di dos.

Texas Furniture a regala un Normende radio como premio pa e loteria cu carnivalscomite lo haci pa hanja placa pa paga gastonan di carnaval.

La Venezolana a priminti di regala Prins di Carnaval un flus.

Firma Mario S. Arends a regala un radio marca „Blaupunkt” pa e comite use manera e kier.

Directiva di Lago Sport Park a pone e stadion gratis na disposicion pa dia 2 di Maart, completo cu podium. Na e lugar ei despues di e parada di carnaval na San Nicolas e premionan lo worde entrega na e ganadornan.

Den e coneccion aki lo nos lectornan por recorda cu e anja aki lo no tin cocard como premio, pero si regalonan di balor mas grandi.

Firma A. H. Lacle a duna un regalo na e fiesta di eleccion di Prins di Carnaval den Aruba Social Club den forma di un caha di whisky „Marchant” y un caha di rom „Rey de Copas”. E firma aki por cierto tin e intencion sigur di participa cu mas di un auto dor na — ta papia hasta di tres! — den e parada.

E firma N.V. Winkel Handel Maatschappij a duna e comite un mixer di regalo y e regalo aki tambe e comite por destina pa e obheto cu e hanja bon. Ademas nos a tende di Aruba Trading Co. cu e firma aki sin duda lo participa na e parada — meskos cu Spritzer & Fuhrmann — tin intencion di haci comite di carnaval un regalo di sorpresa.

Kibramento di cabez pa plaka

Tur e bon regalonan aki di e firmannan comercial local sinembargo no ta

kita cu e comite di carnaval tin hopi rompecabezas cu asunto di finanzas. Pasobra tin varios objetivos cu mester worde paga cu contante (laga nos tuma por ehemplo e podium den Wilhelmina Stadion pa eleccion di Reina di Carnaval di Aruba dia 23). Contant, esei ta falta, y pesei no ta di sorprende cu e miembronan di e comite ta spera cu lo tin clubnan y comerciantenan tambe cu lo kier yuda e fiesta di carnaval pa medio di un suma di un biaha. Ademas hende por contribui tambe den e sentido door di cumpra number den e loteria chikito cual lo principia pronto y tambe door di bai na cantidad grandi na

Wilhelmina Stadion dia 23 di Februari.

Por lo demas....

E actividadnan di carnaval ta aumentando keto bai. Di Rio Club nos a tende cu e eleccion di e reina di carnaval di e club aki, cual lo cuminsa dia 2 di Februari durante di un gran baile, lo worde continua dia 9 (atrobe un fiesta) y cu e resultado di e eleccionnan lo worde anuncia dia 16.

Ademas Bonaire Club na San Nicolas a hanja serka un candidata mas pa Reina den persona di Aura Leonardo.

Ta jammer cu tin algun club cu lo no aparece riba e lista di esnan cu ta participa na e alegria di e fiesta e anja aki. Asina nos a tende di parti di directiva di Douane Sport Vereniging cu e interes di e miembronan di e club a desminui asina tanto cu ya no tin sentido pa cuminsa cu evenmentonan di carnaval. Tambe Commandeursbaai Club na Savaneta mester a keda sin tuma parti comoquiera cu e edificio di e club ta worde renova completamente. Sinembargo den e club aki lo nan duna un fiesta grandi na reapertura y esei probablemente lo tuma lugar den dianan di Pascu di resurreccion.



Riba e foto aki nos lectornan por weita e candidata pa reina di carnaval di Supercleaning Band Box, senjorita Joyce John, kende a keda scohe ayera door di e personal cu ta traha na e firma aki. Na su robex ta keda e runner-up senjorita Irene Rasmijn, mientras cu na derecho e candidata number tres, senjorita Ophelia Gonzalez ta para.